

重修兩淮鹽法志

兩淮鹽法志卷一百四十七

捐輸門

助賑下

光緒四年二月淮南總局運判金筠等稟據通泰場商稟稱頻年以來因堆鹽佔攔轉輸維艱勢成積困然救災之舉得寸得尺溯查場商捐款無不按引帶繳晉災賑需尤關緊要既無躉款之可籌惟有零捐而集事擬請每引捐錢四十文自定案之日起仰懇憲局飭承於給發鹽價之日按引扣收統以收足二萬串爲止卽求彙同運商捐款設法籌解惟捐數收齊有需時日懇轉稟

運憲請於運庫雜款內先行墊解俾濟急需嗣由運司稟經鹽政沈葆楨批准

光緒四年二月刑部侍郎袁保恆奏臣奉

命辦理河南賑務當此財力艱難求於全局無礙而還款又能見信者惟有於川鹽行楚暫緩截止並加抽鹽釐備抵賑需爲兩全之至計查楚岸行鹽川淮互爭日久迄無定局徒令梟販得利正課虛懸夫川鹽成本旣輕運費亦省民閒喜其色味並佳爭買便食利之所在民之所趨川鹽連檣直下官莫能禁淮鹽成本旣重復代認川釐價貴銷遲勢所必然故淮商復岸不能復引徒爲

口資鹽既滯銷不惟代認之川釐不足深恃卽全岸之  
淮課亦必終虧法當早爲變通臣愚以爲與其爲淮商  
爭復楚岸不如就楚岸重取川釐俾川鹽資本過於淮  
商卽以爲漸復淮鹽之地擬嗣後川鹽入楚除照例  
抽釐外爲豫賑加抽十文或八文先以一年爲限倘川  
鹽不禁自止則淮綱立可規復若川鹽暢行如故再試  
一年統將加抽之釐爲豫省撥還借項如以後川仍暢  
銷是終不可禁遏淮綱雖力爭無益應俟豫欠抵完卽  
以加抽全數撥抵淮課定爲常則似此變通辦理既可  
息兩地爭端亦可清豫中積欠並可爲淮課取償伏望

飭議速行經戶部議奏兩楚多淮鹽口岸從前曾國藩  
疏稱二百年舊制不可自我而隳老成卓識誠有見於  
法愈變則弊愈滋必不肯輕更成憲且上年李瀚章丁  
寶楨議覆沈葆楨包餉立限事宜摺內均言鄂省京協  
各餉全恃鹽釐爲大宗又前年湖廣四川湖南各督撫  
議覆禁川復淮事宜摺內均言自定分界行銷暢岸歸  
淮川鹽日滯釐稅逐年減色現在復淮尙無成議則川  
鄂兩省仍須暫收川釐以資接濟川鹽除在本省按年  
抽釐銀五六十萬兩外到楚又收釐錢按年一百五六  
十萬串今復驟議加徵於川鄂餉源有無關礙並近年

來川銷暢滯情形及川商是否獲利較厚請

旨飭下湖廣四川各督臣湖南撫臣迅飭詳查所請加抽楚岸川釐十文或八文作爲抵還豫欠試辦一二年之處能否照議在向章抽釐之外試辦加徵如果無礙於川鄂餉需有裨於豫省賑款卽當准如所奏核明每川鹽一斤暫擬加抽釐錢若干或百斤暫加若干酌中定數趕緊專摺覆奏辦理限於文到半箇月內聲覆

光緒四年二月鹽政沈葆楨奏奉

上諭袁保恆奏豫省賑務需項緊急請於淮南商販每票捐銀三百兩著沈葆楨酌度辦理等因欽此遵經飭運司趕

傳各商妥爲勸辦並迭次劄催在案茲據運司歐陽正  
壩詳稱四岸運商會稟豫省荒歉理應極力協助無如  
救災有願博施無力溯歷年自黃河大捐以來本省賑  
捐閩省賑捐繳款未清旋又有晉省之捐銀數旣多繳  
期尤迫商力已萬萬難支若再加以豫捐勢必將運資  
全行侵挪誤課誤釐獲咎反甚申請奏懇寬免臣覆加  
查核係屬實情若不曲諒其心稍與蘇息非但絕其資  
生之路抑且灰其樂善之心適接徐州府葉運稟奉刑  
部侍郎袁保恆署河南巡撫李鶴年函示豫省饑民四  
出求食飭屬廣爲收恤該郡旣無存款又鮮殷戶兼程

請示前來竊維徐州素乏蓋藏良非虛語然饑民入境  
斷無聽其轉於溝壑之理計此時署徐州道譚鈞培業  
將抵任臣飭江藩司無論何款趕措五千金兌交該道  
並由臣督同各司道各捐廉銀以爲之倡雖車薪杯水  
於大局無所裨補以後何以爲繼亦無從豫籌然於流  
民盡一分之心卽爲鄰省寬一分之力銖積寸累安得  
以善小而不爲續據候補道張汝梅稟稱在清淮爲袁  
保恆採辦糧食運豫平糶經費不足臣於金陵釐局提  
米釐三千金濟之並准新任河南撫臣涂宗瀛咨函派  
員於上海勸捐查上海晉捐尙未繳齊商力亦强弩之



末然涂宗瀛曾任關道爲輿情所愛戴雖棉薄當必有以相酬理合附片陳明

光緒四年六月鹽政沈葆楨奏准部咨議覆翰林院編修劉海鰲奏請准鹽每斤暫加賑釐三文奉

旨敕臣查覆茲據運司詳稱以斤計引每斤三文每引合錢一千八百文南鹽以五百引爲一票每票須繳錢九百貫分計似少合計實多加於售價之內則病商加於售價之外則病民均屬窒礙等情臣伏查權鹽以疏銷爲主而疏銷以輕本爲先淮南自定新章鹽釐爲數頗重疊經前督臣曾國藩一再奏請酌減尙未能收敵川之

效儼加釐而銷滯將並正餉而虧之病商病民其究終於病

國除川鹽能否加釐應由川楚督撫臣酌量情形具奏外所有淮鹽礙難暫加賑釐緣由附片覆陳

光緒八年八月署運司徐文達詳據淮南總局稟稱據通泰場二十八商呈稱本年江湖泛漲近聞安徽潛山等縣蛟水下注以致焦山池下南北兩岸各圩閒遭衝決公同集議請按照儀棧存鹽引數每引捐錢五十文見存不足三十萬引總以三十萬引捐足一萬五千串爲度以作安徽及揚鎮各圩賑恤之用並請由運庫先行

籌墊錢一萬五千串以八千串撥解皖省七千串酌留揚鎮所有揚鎮之款見由商等公同查明各災區會辦應請發交商等承領分別歸墊備用仍由總局於後五成尾課內按引扣收錢五十文解還歸墊等情署司擬於淮南總局所存通泰兩屬河費款內暫借撥錢一萬五千串以八千串易銀撥濟皖賑由署司派委巡解皖省其餘七千串爲揚鎮各圩撫恤之用經鹽政左宗棠

批准

光緒八年九月運司徐文達詳據淮南總局稟據鄂湘西三岸運商呈稱本年皖省猝被水災商等共捐錢一萬

五千串皖商已由岸局勸捐銀一萬兩應將皖岸剔除  
不令再捐揚屬賑需惟思皖岸賑款所籌較多揚屬沿  
江各洲待賑甚殷可否以八千串撥交揚屬放賑以七  
千串解助皖賑仍懇先由總局籌款墊發俾早全善舉  
請卽按岸分攤照各岸通綱額引分別派數俟開綱買  
鹽時卽逐票照繳歸墊以期畫一而免久延等情經鹽  
政左宗棠批據詳鄂湘西三岸運商議捐皖揚賑需一  
萬五千串以七千助皖賑以八千串助揚賑洵屬好義  
急公可嘉之至應准查照場商捐助之案由司先行籌  
墊仍一面妥議按綱攤繳章程稟詳立案

光緒九年九月順天府府尹周家楣奏本年各省水災統計全局民命至重籌撥必應從寬庫款未裕源流均須合計目下順天急撫將竣本年冬撫大局籌備亦將就緒而來年春撫不得不及早預籌各省災需不能不亟謀巨款兩淮經左宗棠新添各票報效之項每票萬金而舊商之票初無成本歷年捐賑報效每票不過三千餘金出資既輕獲利較久專就離務論之既覺新舊之參差聞左宗棠正議加舊票各商以期平允而就賑務計之則正項既未可輕撥巨款又未易另籌若令舊票各商每引捐銀十兩以作賑需於商力既不至爲難而

於籌賑則大有裨益擬請

飭下左宗棠飭令四岸舊票各商一律援引捐銀十兩以其半歸順天直隸以其半歸江蘇山東各賑撫之費

謹按嗣經左宗棠飭據運司孫翼謀稟據四岸運商稱力難再輸票本詳見捐收票本

光緒九年十月運司孫翼謀申東省水災前奉勸捐經本司捐助廉銀一千兩於八月由三晉源匯號兌解山東撫憲衙門投收茲據淮南總局稟據鄂湘西皖四岸運商蕭怡豐等稟議捐銀一萬兩懇請照案先由司庫籌款墊解以紓商力等情查淮南引滯銷疲商力既艱商

情又眾一時遽難集成見銀而東省待賑孔殷亦屬勢不能緩自應查照成案由司庫雜款內先行籌墊庫平寶銀一萬兩又鹽屬各員共捐廉銀庫平寶紋四千兩二共銀一萬四千兩裝鞘十四根已委員於十月初九日起解山東河工餉銀之便附解至山東撫憲衙門投收

光緒九年十一月湖北督銷局道員程桓生稟頃准湖北司道咨本年沔監等州縣水災極廣亟宜拯濟見奉

諭旨准照直隸山東成案開辦賑捐茲咨送聯票二百張希傳集票商勸諭等因查各商見因順天直隸江蘇山東

收用各在案伏查該場運各商捐助銀錢爲數較鉅該商等捐助山東賑銀已奉准給獎敘今所捐前項賑需事同一律懇飭司查取商捐各戶姓名籍貫履歷按照捐數造冊詳請分別咨獎以昭激勸經鹽政左宗棠批查運商捐銀二萬兩旣由運庫墊發是何商捐銀若干尙無姓名可考况揚郡留養災民亦未有奏獎之案不得牽扯山東賑案率請咨獎

光緒十年閏五月湖北督銷局道員程桓生呈稱查協濟湖北監河賑捐一款原議於售鹽時勸各水販每鹽一引除正價外助賑濟銀一錢隨鹽價核收並由職局先



墊撥庫平寶銀五千兩解交湖北賑捐總局查收濟用  
仍俟收齊歸款各在案旋奉憲檄加收江防經費此時  
若再併收監河賑款未免過於喫重擬於核收江防經  
費之日卽停止助賑一錢之款所有五千兩預墊未足  
之數卽於新收款內盡還查漢武黃德各局自光緒九  
年十二月起至十年三月止共收賑濟庫平寶銀三千  
五百四十六兩八錢七分三釐歸還前墊款項仍不敷  
銀一千四百五十三兩一錢二分七釐應俟新收江防  
經費項下盡扣清款另文咨報

光緒十一年七月署運司程桓生稟本年兩廣山東水災

前奉諭飭勸各商量力捐助茲據淮南總局稟據通泰  
場商聚和公等呈稱公同集議共捐制錢六千串先由  
錢莊籌墊每月認息八釐按每引捐錢五十文以捐足  
四十萬引爲度自七月初一日起捐由局代收連本計  
息陸續飭發歸款又據四岸運商蕭怡豐等稟公同集  
議共捐曹寶銀七千兩先向票號借出見銀呈繳每月  
八釐行息按照通綱額引起捐除粵籍承辦之四萬餘  
引已另行籌捐湘災一萬引免捐其餘核計每引攤扣  
曹寶銀一分六釐鄂岸自庚辰秋綱起湘岸自己卯春  
綱起又平江歸丙戌春秋兩綱扣收西岸自癸未秋綱

起皖岸南鹽自己卯秋綱起北鹽自壬午春綱起由局  
按引扣收歸還借墊本息等情並據江都縣知縣謝延  
庚稟以本年七月江湖異漲沿江圩田浸決請飭局諭  
商量力捐助抑或將場運各商集捐兩廣山東災賑款  
內分撥賑恤各等情署司查本年水災疊見兩廣爲甚  
山東次之自應將所捐銀錢飭局一律集齊見銀聽候  
分別撥解至江都請賑理應籌濟惟此日所捐銀兩係  
屬認息借兌斷難再令重捐查揚州光緒九年收養災  
民案內尙有商捐賑款用贖銀一萬兩本係淮南商所捐  
前經揚州府發交江甘兩縣存典生息目前既須賑濟

前項贍銀儘可酌撥濟用若以前年捐存之銀由縣存  
典生息復飭各商再捐認息之款殊於情理未順此稟  
正繕開續奉諭以沿江一帶猝被風潮派員賑撫擬由  
兩廣山東商捐款內酌留若干署司擬於兩廣山東捐  
款內酌提銀二千兩留作鎮江賑需餘仍各半分解至  
江都請款則更難以挹注似可竟令在於前年商捐賑  
款用贍銀一萬兩內酌量提用經鹽政曾國荃批准

光緒十二年九月鹽政曾國荃劄運司等本年直隸山西  
山東水災較重前月雖經勸助杯水車薪抱歉無已茲  
因巡閱赴浦勸令江北殷實及淮北票販捐貲協賑該

紳商允許三省各捐銀一萬兩自應准如所請以後不得援以爲例惟須迅速籌解方足以濟眉急旋經海分司項晉蕃稟直東兩省二萬兩已解交王道核收轉解外其山右賑銀一萬兩業已收齊當與田副將商議自僱驛車專派弁勇押解較之匯局尤爲迅速擬於十六日解交以便起程

光緒十三年十一月五河卡委員郭階稟稱准安徽賑捐局移開奉撫憲劄以安省本年河決南趨水災工賑需款甚殷飭一體勸捐查淮北地方夏間伏汎泛漲沿淮禾苗多被損壞加之八月內黃水南趨自河南鄭州等

處及安徽鳳潁各屬黃流浸灌之處田禾概行淹沒以致鴻嗷徧野待賑孔殷見在各處均已籌捐賑濟昨准運司咨准北票販亦將勸其按引捐賑未言捐及湖販惟查湖販捆運票鹽五河卡每包收釐錢五百文向係稟定章程九成收銀一成收錢近因河南江蘇兩處均辦河工各省均辦賑饑需錢較多以致各處銀價概行大跌而湖販呈繳銀價仍照舊章其中每兩取巧一百餘文職道以多年舊章未敢稟請減價然湖販之富厚視饑民之溝壑何止霄壤查前辦黎守曾於九年內捐協安省賑濟每包十文並未稟明有案而湖販樂輸此

次擬於各湖販當銀價取巧之時每包捐錢二十文測  
隱之心人皆有之想此善舉諒亦樂輸再前有湖北沔  
陽難民百餘人自五河經過職道捐廉資遣回籍近來  
鄉鄰族戚屢有來五河者言沔陽興國黃梅廣濟等處  
潦旱兩傷難民逃荒者絡繹是以蘄水等處雖不甚荒  
亦辦團練以資彈壓職道擬將各湖販捐輸俟積有成  
數分解河南二成半安徽二成半江蘇二成半湖北二  
成半集腋成裘亦可稍助賑濟之用俟鄭工合龍卽行  
停捐前在上海曾辦各業商賈賑捐協濟直隸收捐時  
發給三聯收票由捐生持收票報捐本人不請獎者准

其移獎認票不認人捐生繳票呈明報捐何項填換三  
聯實收將副實收每月稟請咨部給獎此次湖賑捐輸  
擬請仍照前章辦理俟奉批後曉諭各湖賑自十二月  
初一日起按包捐輸隨釐呈繳經鹽政曾國荃批查黎  
守於九年捐協安省賑濟每包十文既未稟明本不足  
准見在湖賑獲利甚微該道擬每包捐錢二十文未免  
過多惟據稱銀價大跌此中稍沾餘潤而各省饑民待  
哺嗷嗷誠如來稟惻隱之心人皆有之應自本年十二  
月初一日起按包准收捐賑錢十文以資協濟一俟各  
省停賑卽行截止所收錢文擬請分解四省尙屬公允



惟給獎一事自捐例停後部議綦嚴非該道在上海時辦捐可比將來解往何省應由該道稟請何省督撫能否歸入該省獎案辦理統候批示遵行十二月郭階稟當諭各湖販於十二月初一日到卡掛號者起每包捐錢十文隨釐呈繳各湖販到卡繳捐職道擬請按照前章隨時發給三聯收票嗣後由捐戶持票請獎惟請獎應分別稟明四省督憲撫憲核辦如照前稟每省分解二成半則一人捐款須分四分頗難畫清查河南水災最重安徽次之湖北又次之江蘇又次之擬請更正以輕重分先後自本年十二月分起捐款歸河南明年正

月歸安徽二月歸湖北三月歸江蘇周而復始以昭公允請獎亦擬照此次第所有聯票內按月註明省分一俟停賑後准捐戶持票請獎經鹽政批允

謹按此宗捐賑爲數無多嗣於光緒十四年九月河南巡撫倪文蔚咨稱收過五河卡捐錢二千六百餘貫均交周口賑廠驗收又於光緒十五年二月湖北巡撫奎斌咨稱收過五河卡捐錢二千四百餘貫此外蘇皖兩處收數略同經五河委員許薩阿稟此項賑捐爲數無多查鄂省頒移賑捐章程內開所有歸併上兌名目應卽禁止一條則零星捐戶自不應歸

併上兌至辦理司事並未另派所有湖販司事均不敢上邀獎敘又湖販長茂興等稟鄭工合龍擬請將前項賑捐從十四年年底截止本年留捐三箇月歸入修建大王廟及工程之用經鹽政曾國荃批准

光緒十四年九月鹽政曾國荃劄行鄂湘西皖督銷局本年安徽鳳陽潁泗暨濱臨淮河各屬黃流下注江蘇揚鎮徐甯各府及安徽廬州滁州並安慶以下各處山田亢旱成災其被水淹沒者流離失所溝壑堪虞其被旱枯稿者顆粒無收啼號更慘且自秋冬以至來春爲日甚長一經散放官款總慮不敷本爵部堂軫念民艱深

恐施濟未能徧及亟應廣爲勸募兩淮場運各商上年捐輸河工鉅款後銷數甚疲商力亦有不逮必須斟酌盡善除淮北票販淮南場商前次捐輸係由庫墊繳迄今庫墊均未繳清礙難再捐外其鄂湘西皖及食岸各商凡遇鄰省偏災無不竭忱報效此次被災之區更爲切近何忍膜視應卽妥爲勸諭聽各商量力輸將捐多捐少或竟無力報捐各從其便以勸而不派施而不怨八字爲本俟捐有成數隨時批解金陵支應局兌收具報以便分撥濟用所有該捐生等捐輸銀兩並准彙案請獎備有捐助鉅款當爲奏請從優獎敘此次捐不設

局委不給薪力省浮糜之資盡作賑撫之用

光緒十四年十二月鄂湘西皖運商雲豐恆等稟奉諭勸輸蘇皖賑捐公願每運鹽五百引捐銀二十兩共計鄂湘西皖四岸額運鹽五十六萬三千七百六十引共捐銀二萬二千五百五十兩四錢擬請在場在岸各半呈繳並請在場卽按票由辦運時繳完在岸卽按票歸售鹽後扣繳更請在場所繳之款就近酌留撥給甘泉儀徵災賑至在岸繳款卽由各督銷局遵解金陵支應局兌收並請飭淮南總局暨四岸督銷局先行籌解由商等按引陸續繳還再皖岸每票祇有一百二十引其捐

款出岸場分繳爲數畸零應請統歸岸局按數扣繳經  
鹽政會國荃批據稟僅捐銀二萬二千餘兩爲數太微  
本難照准姑念各岸銷數之疲商力之困皆屬實情此  
後尙有

慶典鉅款不能不借資商力賑務固屬要需商情亦宜兼顧  
准如稟辦理惟請由淮南總局及各督銷局墊解查各  
處所收近皆短絀均屬無款可墊且見在當牛及製棉  
衣辦工放賑需用既繁且急該商等素顧大局必須呈  
繳見銀方爲急公准分臘正二月三限初限每票繳八  
兩二三限每票繳六兩其願歸初限全繳者聽不拘在

岸在揚按票依限繳清統解金陵支應局此項捐銀係  
集腋成裘應歸入零星捐戶之列毋庸給獎以免輾轉  
售票致占正捐其各食岸如何捐繳並著運司妥速勸  
諭嗣於十五年十月運司稟食岸各商共認捐庫平銀  
一千二百兩

兩淮鹽法志卷一百四十七

兩淮鹽法志

卷一百四十七

捐輸門 助賑下



兩淮鹽法志卷一百四十八

捐輸門

助工

水之爲害匪獨湖河巨浸汎濫肆虐卽細流小瀆偶遇衝決則橫溢四出跨州連郡皆有爲魚之患

國家歲糜帑款數百萬築隄濬河未嘗絲毫派之於民而健茭之費有時借資商力亦必優予獎叙酬其報効之忱舊志所載自乾隆訖嘉慶商捐河工寥寥數篇此後竟無聞焉今自同治五年清水潭之役以及鄭工皆詳錄之志助工

乾隆三年興修淮揚水利鹽商黃仁德等捐銀三十萬兩

以佐大工

互見疏濬

乾隆二十四年十月鹽政高恆奏揚州護城河暨城內市河久淤前據眾商情願捐挑卽經率同運司揚州府勘估共需挑河修建橋梁銀一萬七千六百餘兩當經奏明飭委江甘二縣辦理依限完竣驗收惟是揚城內外煙戶稠密不能任其傾潑以致淤墊飭據運司揚州府議令江都甘泉二縣各設小船二隻往來遊巡遇有坡土衝卸入河卽行罾撈其兩岸零星灰土亦卽用船運至城外空地若大堆瓦礫廢穢之物俱令商民自送出

城如敢傾入河內卽令小船水手稟究仍押令挑撈運出每年二八月委令典史逐段探量畧有淤淺處卽行撈撈小船水手怠忽重責革換該二縣身任地方稽察疏浚是其專責倘有玩視均應參處奉

旨允行

乾隆四十七年六月鹽政伊齡阿奏豫省蘭儀商邱等處開挑引河據商人江廣達等呈請公捐銀二百萬兩以應工需奉

上諭著解赴東省以資工賑之用欽此

嘉慶五年七月鹽政書魯奏據商人洪箴遠等呈稱邵家

壩漫口下埽興工合龍在卽商等居處下游咸慶安業  
情願另捐銀五十萬兩以備工需惟商等資本在外一  
時難收請於運庫徵存銀內墊解自辛酉綱起分六綱  
帶完歸款奉

上諭照書魯所請行欽此

嘉慶八年十月鹽政佶山奏據淮南商人洪箴遠等呈稱  
豫省衡家樓黃水漫溢一切堵築工費甚多情願公捐  
銀一百十萬兩以資工需報捐銀兩現繳運庫恭候備  
撥欽奉

俞旨並

敕咨部議敘

嘉慶九年正月鹽政佶山奏據淮商洪箴遠等呈稱上年衡工漫溢東省蠲賑兼施已無一夫失所惟開春青黃不接貧民生計維艱且挑挖河身增高隄岸人夫雲集糧價不無昂貴情願借撥鹽義倉穀十萬石解赴東省以資協濟所需水腳運費俱係商捐動缺穀石本年秋成後公捐買補還倉奉

旨允行並分別議敘

嘉慶九年四月鹽政佶山奏據淮商洪箴遠等呈稱商等世受

國恩茲聞衡工合龍河流順軌情願公捐銀一百萬兩以  
佐善後之用請先繳銀五十萬兩其餘五十萬兩限五  
箇月繳庫候撥奉

旨賞收並照例議敘

嘉慶九年十月鹽政佶山奏據淮南北商人黃藻泰程儉  
德等呈稱今夏湖水盛漲高堰隄工見需修築以資保  
障商等居處下游情願公捐銀四十萬兩以佐工用欽  
奉

賞收並

敕咨部照例議敘

道光十五年四月題司俞德淵申據泰分司詳東臺等七  
場商人接引捐銀領挑青浦閘至海道口運鹽河道緣  
由奉批後卽經諭飭淮南辦事商人傳知各運商按引  
扣銀繳庫並飭分司場員遵照嗣據泰分司詳據七場  
各商稟以海道口至郭家堡計程三十里本屬極淺之  
區久無底水見在僅存尺許若俟按引繳納爲期甚緩  
情願捐湊銀兩擇淺挑濬並請將按引捐備之案註銷  
等情當查係屬實在情形批令督飭各商趕緊集夫及  
時挑挖深通以利運行去後旋據該分司稟海道橋以  
南碑亭一帶幾成平陸惟有乘此運河無水之時仍照

各商前稟依上綱出鹽之數約銀一萬二千餘兩由卑職卽飭丁草伍劉新廟場員並嚴諭該商等速選董事責令來東卽於四月初一日集夫興挑惟各商捐資不無拮据若力有不及當酌量請借庫欸等情據經札委伍祐場白大使東臺場童大使候補大使周耀曾候補從九品吳寅溱潼委員藍海幫同該分司分段照料在案今據該分司詳據東河等場商稟稱商等籌議就極淺處自海道口起至嵇家樓止勘明五千三百一十丈估挑河口寬五丈底寬三丈挑深四尺核計挑土八萬四千九百六十方先行截壩興挑照上綱七場挂號引



數四十三萬五千三十五引每引捐銀三分共捐一萬三千五十一兩五分商等自行分赴工次稽給壩工土方夫價已於六月初一日築壩車水按段集夫自海道口至十八里河口計分二段於四月初六日開工其十八里河口至嵇家樓計分二段河心積水捲埽車戽各夫於初九日次第下塘見已一律挑挖荷蒙運憲委員彈壓惟查商等所捐銀兩核計築壩車水散給挑夫蓬席土方工價急工懸賞陰雨接濟及釘椿捲埽掀戽浮土車戽滲水等事通盤籌算實有不敷如借給銀兩仍須商等帶扣惟各場各垣重鹽先後不一兼有租辦者

年分不齊與其事後轆轤偏枯莫若乘時加派以免領  
繳之煩再查梁垛出場鹽船向由十八里河出口仍歸  
此河運行未便聽其取巧今挑三十里除海道口至十  
八里河口十里該場鹽船不走外仍有二十里工程應  
減去一分照出場引數每引捐出二分該場上綱挂號  
一萬六千五百三十五引應捐銀三百十兩七錢又廟  
灣場出場鹽船近因河道淺阻閒或走西今一律深通  
自必仍由故道運行所有工費亦應派出計上綱挂號  
鹽一萬二百四十三引每引捐銀三分應捐三百七兩  
二錢九分商等再照上綱出場鹽數每引加捐銀六釐

梁埰廟灣二場亦一體加添等情經鹽政陶澍批准旋據司報於四月二十八日完工又據報廟灣商鹽走西不由此河運行銀未據繳並請將前請每引攤銀三分之案註銷

同治五年九月署運使程桓生詳本年湖河泛漲自清水潭潰隄之後泰屬鹽場被淹居多急應及時修築以固根本擬令鄂湘運商每引酌捐銀一兩西皖兩岸銷市較旺每引或酌加銀一兩收有成數照章請獎據瓜棧總局稟稱查鄂湘兩岸近來銷市較滯轉運較遲所有每引捐銀二兩擬請稍從減少西岸獲利不及從前之

厚而銷數稍旺比之鄂湘捐數似應酌加而每引捐銀二兩亦覺稍多至皖岸銷數雖勝鄂湘而獲利較遜西岸其捐數似宜比鄂湘加增比西岸略減至繳捐章程各岸細分情形不同查見在鄂湘西皖未經開江之引尚可於請領買單給發護照時分別飭繳其各岸已開江之引應由各督銷局查明按引補完至西岸丙春之引皖岸乙秋之引開江到岸多半早經售竣無從核扣擬請將各岸應捐銀兩一律先期曉諭統於某月某日起捐西皖兩岸定限四十天呈繳憲庫鄂湘較遠定限六十天並擬仿照開綱辦法繳捐依限者登記註冊逾

限未繳者扣除另招等情查西岸以丙寅春秋兩綱丁卯春綱十五萬引爲額除見在籤掣三萬七千餘引已經捐銀二兩不復重捐外其餘十一萬二千餘引每引應捐銀一兩四錢又皖岸乙丑秋綱丙寅春綱七萬二千引爲額每引應捐銀一兩鄂岸以丙寅春秋兩綱十二萬引爲額每引應捐銀六錢湘岸以乙丑秋綱丙寅春秋兩綱十八萬引爲額每引應捐銀五錢仍俟捐有成數循案詳請獎敘以示鼓勵所有捐繳限期應自本年九月初十日起西皖兩岸定限四十日鄂湘兩岸定限六十日無論已未開江銷售均應一律繳齊如逾限

不捐定卽扣除另招經鹽政李鴻章批准旋據皖商朱同義等稟奉飭捐經費修築清水潭隄工以乙丑秋綱丙寅春綱七萬二千引爲額每引捐銀一兩查皖岸爲利最薄每百斤僅定售價銀三兩計每引售銀二十兩六錢四分內除買鹽成本每引銀七兩二分四釐釐金公費每引銀八兩一錢二分六釐運腳每引銀一兩七錢二分八釐共需銀十六兩八錢八分八釐每引僅餘銀三兩七錢五分二釐至西岸則每百斤定售價銀三兩五錢每引售銀二十四兩八分內除買鹽成本與皖岸同每引銀七兩二分四釐釐金公費每引銀九兩六

錢六分八釐運腳每引銀二兩六錢八分八釐共需銀  
十九兩三錢八分每引尙可盈餘銀四兩七錢比皖岸  
實多售銀九錢四分八釐此皖岸之不如西岸也鄂岸  
則牌價稍貴而公費亦稍輕每引買鹽成本銀七兩四  
錢二分八釐釐金公費銀九兩二錢八釐運腳與西岸  
同每引銀二兩六錢八分八釐共需銀十九兩三錢二  
分四釐售價亦定每百斤銀三兩五錢每引尙盈餘銀  
四兩七錢五分六釐比西岸尙多餘銀五分六釐所不  
如西岸者以涵耗較多銷售較慢而有此長數總比皖  
岸較勝此皖岸之並不如鄂岸也惟湘岸則成本公費

以及售價一同於鄂而道路益遠運腳加重故不能與鄂同例而略足與皖相當至謂皖係中路一年可以往返兩次殊未思自甲子秋間定章之後每年額銷七萬二千引歷年以來並不能如數銷完見屆丙寅之秋季尙未開丙寅之春綱則皖引之滯略可想見一年之間何能兩運況其時江運八岸尙未認定南鹽尙可分銷北路見江運已奉招商一經認定則南鹽銷路益窄今捐數雖較輕於西而實較重於鄂叩求准於鄂湘之間酌中定數至運憲定限自九月初十日起西皖兩岸限四十日鄂湘兩岸限六十日無論已未開江銷售均應



一律繳齊如逾限不繳定卽扣除另招等因此又各岸  
商力所未逮而皖岸爲尤難者也緣此時各場均被淹  
浸買鹽甚難不能不先期定鹽預行交價則商本概已  
出手安能有此餘力頓繳兩綱巨捐且別岸票大引多  
承辦者多係殷實大商一時或尙堪設措皖岸則票小  
引少領運者半係零星小戶倉猝難以張羅伏乞准令  
展緩分作兩綱先後繳納經署鹽政李鴻章批決口早  
堵一日則亭場早涸一日轉餉產鹽復額受益無窮況  
皖岸運道較近每商認引亦斷不止一票總可轆轤轉  
輸江運八岸亦尙未認齊開辦約計餘利卽如稟內所

稱每引僅餘三兩七錢零除去工捐一兩所獲盈餘尙較勝於販運別貨況鹽價水腳猶可節省乎鄂湘西岸捐數業經出示定案未便再事更張所定捐繳限期各岸一律遵辦該岸何能獨異礙難准行

同治六年三月西商同德利稟上年清水潭大工奉定西鹽每引捐銀一兩四錢商丙寅秋綱派運三千引應繳捐銀四千二百兩當因比時銀路艱澁隨即陸續設措繳完一千五百引捐銀二千一百兩其餘一千五百引捐款因奉有准予在岸捐繳之示適商認運引內已有五百引開江運岸旋即稟請將未繳捐銀在於到岸五

百引售課內提繳以免誤公嗣因捐限緊迫在岸難於設措商仍卽在場措繳商正擬設法措繳岸局已將此引註銷因思工捐一項各商遵繳亦屬前後不齊除皖岸各商完繳固屬不一外而廣昌隆亦始請在岸呈繳復又來揚補完吉泰森因揚岸逾限未完見始甫經補繳均蒙准予照收亦未聞岸局有註銷之事伏乞邀免註銷並將捐銀備齊稟叩兌收經鹽政曾國藩批此案前據西岸督銷局申報該商繳捐遷延將引扣除另招源遠長等捐銀二千一百兩移解運庫是引已改給新商認定局中未便失信再行收回惟據稱應繳工捐係

因一時銀路維艱以致有耽時日向屬情有可原候札  
淮運司西岸督銷局將該商花名存記無論在揚在岸  
遇有另案註銷之引先儘該商補認一千五百引以示  
體恤

謹按嗣於十年九月以直賑西岸加二萬引每引捐  
銀六兩飭准補認一千五百引照章呈繳捐款免予  
掣籤

同治六年四月署運司程恒生稟查上年清水潭決口數  
百丈經前鹽政李奏准將江甯蔣庫所存各款全撥工  
賑之用此外不敷銀兩飭令地方紳富及淮南鹽販酌

量籌捐以資補助所捐銀兩准照籌餉新例遞減二成  
請獎並准移獎子弟親族由司先給實收隨時造冊報  
部換給執照其貢監職銜查明藩庫有無舊存空白各  
照先行填用又奉札飭派令通州如皋各捐銀五萬兩  
泰州泰興各捐銀二萬兩海門捐銀一萬兩江都甘泉  
共捐銀一萬兩咨請一體催繳運庫解工濟用各等因  
當卽分委各員嚴催提解又飭淮南各商捐輸除補足  
西岸三綱引額三千餘引每引捐銀二兩其餘各岸舊  
認之引經署司以岸銷之暢滯分捐數之多寡酌用每  
引西岸捐銀一兩四錢皖岸捐銀一兩鄂岸捐銀六錢

湘岸捐銀五錢數月以來共據各商販繳銀四十餘萬兩各州縣解銀十二萬餘兩見在鹽務捐款鄂西皖三岸業已清繳湘岸亦將次解清自應由司刊刷實收飭令淮南總局查照例案辦理請獎毋庸另行設局以節糜費至藩庫有無舊存空白各照向來每例銀百兩應收部飯照費等銀若干署司衙門無案可稽其各州縣捐款均由運庫轉解郵工濟用此次辦理請獎亦應歸總局經理經鹽政曾國藩批准

同治八年九月署海分司許寶書稟據淮北票販稟稱小邳堡隄工急籌巨款販等久業北鹺疊經兵燹自同治

三年督鹽憲曾釐定新章元氣稍舒乃利之所在趨之若鶩壬戌綱驗貲至五十萬兩癸亥綱更多至一百五十萬兩率皆外來之戶僅圖賣號之利無論其昔未茹苦今則分甘卽以販等借貲出利買號還引計之其出入已大爲所累甲子新綱稟奉憲臺詳奉督鹽憲批開本年癸亥綱驗貲流弊極大不特票販借貲認利成本加增其新商得引之後率皆高擡引價賣號而不辦鹽甚有攜挾厚貲專放重利旬日獲利數千兩者所稱利歸中飽自係實在情形旣據稟請查照癸亥綱實運花名利數接認下綱係仿淮南環運章程尙屬可行本部

堂與曾爵閣督部堂面商應准免其驗貲卽飭癸亥綱各舊販按照實運花名引數接認甲子綱正額遵章納課等因販等報效無由今因小邏堡隄工急籌巨款其報效銀三十萬兩不敢仰邀獎勵惟懇將前奉批准循環轉運章程恩賜查照見運花名引數卽以乙丑綱起准予遞綱循環免再按綱驗貲則感受仁施曷其有極所有報效之款擬請先繳一半其餘一半按照乙丑一綱隨課完納清楚不致貽誤查該販等因見在舉辦小邏堡隄工情願報效銀三十萬兩尙屬踴躍急公仰乞賞收准飭該販等自乙丑綱起援照淮南環運章程遞



綱給予循環轉運以示鼓勵經鹽政馬新貽批准淮北甲子綱鹽已銷八十餘萬包轉瞬卽須認辦乙丑新綱該販等以驗貨出入大爲所累公同集議情願報效銀三十萬兩解濟運隄小邏堡工需不敢邀獎請自乙丑綱起遞綱循環尙屬踴躍急公查淮北驗貨之弊不可枚舉本毋庸濫招新商致啟賣號占引之漸旣經該販願捐巨款出於至誠准自乙丑綱起援照淮南循環給運章程將見運花名遞綱給運俾各票販永遠執業以昭信守儻有誤運誤課之商仍隨時詳請扣引至報效之欸據請先繳一半其餘俟乙丑綱開後隨課完納應准

照辦

同治十三年十月鹽政李宗羲札江安糧道淮運司見在黃水全溜勢將南趨兩淮鹽場均處下游岌岌可慮亟須設法疏洩以衛淮鹺而安池竈又被水各州縣人民流離載道約計工賑所需總在八萬以外兩淮運商票販及食岸各商久沾樂利淮北各販祇捐過小邏堡工費每引一兩淮南各商祇捐過清水潭工費每引自一兩四錢起至五錢不等食岸各商並未捐過今持平酌定此次捐數淮南應每引捐銀八錢淮北應每引捐銀六錢照通綱額數按引捐繳仍仿照清水潭之例奏請

給獎卽傳知淮南北及食岸各商販遵諭報捐如有不  
願者卽將引票註銷另招新商給票認辦不必稍有抑  
勒總以不改章不加引爲保護之計此時水患較清水  
潭爲尤廣工程較小邏堡爲尤大各商販尤宜激發天  
良輸將恐後不得稍存觀望嗣於十一月運司方濬頤  
署江安糧道薛書常詳稱據鄂湘西皖四岸運商稟請  
分爲四限完繳江甘高寶天長五岸高溧句商人上江  
浦六商人各請分別展限儀泰等岸飭與江甘等岸一  
律遵捐又淮北票販等皆請分期呈繳經鹽政批准南  
各商准其於年內按引先繳四錢其餘四錢分爲兩限

以來年二月二十日爲一限三月二十九日爲一限埽  
數完繳食岸各商應一律照辦不得稍分軒輊淮北各  
販准其於年內先繳九萬兩其餘俟來年售鹽開除時  
隨同經費按引帶徵仍照通綱額數捐足爲止以紓商  
力然總在四月底爲期不能拖延仰候奏明給獎

同治十三年十二月鹽政李宗義奏徐海兩屬前因黃溜  
南趨居民蕩析離居經臣奏請將江甯府屬抵徵項下  
買米起運錢文留備賑濟惟此次被災較廣加以六塘  
等河積水難消必將海口大加挑濬庶有去路見又欽  
奉

諭旨飭修運隄其殘缺處所本擬擇要修補亦係必不可緩之工統計挑河修隄工段綿長需費亦屬不少不能不另籌接濟因思兩淮商販近年銷數雖疲而計利較厚黃水下注亦爲場竈切膚之害前此清水潭決口曾據各商販按引輸將湊集巨款始克迅速戡事見經臣派委署糧道薛書常前往揚州會同運司方濬頤飭傳南北各商販曉以大義妥爲勸諭各商販均尙急公淮南每引認捐銀八錢淮北每引認捐銀六錢已據詳明分限解繳自當隨時撥作工賑兩項核實動用查清水潭捐輸奏明按照籌餉新例遞減二成給獎如本身不願給

獎准其移獎經部議准此次事同一律仰懇

天恩俯准循案辦理嗣於光緒二年三月戶部議奏查所捐銀兩既據奏稱分限解繳迄今已逾一年捐繳銀數自己積成巨款乃尙未據奏報請獎一次其爲輾轉售賣捐票紛紛移獎以致遷延不報已可概見若不予以限制不特捐生避多趨少於各省捐務大有關礙且名器冒濫尤屬非宜所有兩淮商販按引捐輸除道府州縣及奏明祇准在京捐局報捐各項不准請獎外其報捐實職人員應請祇准捐至雙單月爲止不准報捐分發及分先分閒儘先等項花樣並與

封典各項均不得逾五品請獎銀數均照籌餉例定銀數  
核算不准截收祇准移獎子弟不准移獎異姓統限於  
本年年底將所收捐款分別次數一律報部請獎逾限  
概行議駁

光緒元年正月海分司于寶之稟奉札准戶部咨兩次奏  
撥兩淮鹽釐十六萬兩解濟山東隄工等因此項撥款  
應於四岸督銷局分欸撥解惟恐鹽釐起解需時應飭  
催淮南北各商即將年內應繳捐款刻日趕解預備墊  
解札飭遵照趕催一俟商捐繳有成數卽行飛稟以便  
酌撥等因奉查淮北票販每引捐銀六錢前奉運司糧

道轉奉批准年內先繳一半計九萬兩餘俟明年售鹽時隨同經費按引帶繳捐足全綱額引爲止總以四月底爲期奉經轉諭各販所有淮北年內先繳一半銀兩業已全數繳齊暫儲卑庫候撥至此項捐款係照全綱額引按引飭繳計淮北額運二十九萬六千九百八十二引每引六錢實計應捐銀十七萬八千一百八十九兩二錢除年內先繳一半外餘俟明年售鹽時按引帶繳總不得逾四月之限惟全綱內尙有同善源花名六千引係爲清淮善舉之用應否照繳計六千引年內先繳一半應派銀一千八百兩未經照繳均候奉示分別



遵辦再於十二月奉河工局札開所需用款當經稟明在於該分司庫先行借撥三次共借撥庫平合封銀一萬四千兩均經該分司解交銀錢所照數兌收茲尙需續撥銀六千兩連前共撥銀二萬兩此項銀兩統於淮北販捐工賑款內動撥札飭備具解批等因當經遵照札飭先後四次借撥庫平銀二萬兩備具文批解交河工局兌收又前奉札飭撥解徐海道賑需銀四萬兩淮揚道賑需銀一萬兩撥解河工局轉發林牧達泉賑需銀五千兩又於十二月奉札飭撥還江西所解銀九千兩卽日解赴漕憲衙門兌收轉交山東均經分別批解

各在案共計卑庫先後撥解過庫平銀八萬四千兩應請卽在淮北販捐年內呈繳一半銀兩項下照數動撥歸欸經鹽政劉坤一批八萬四千兩如稟在於販捐一半銀兩內照數撥還歸欸至同善源票鹽六千引捐欸當仿照小邏堡隄工報效撥收協濟

光緒元年六月鹽運司方濬頤等詳五月奉札淮南各商捐欸已一律繳清應參酌成案籌辦給獎等因茲據淮南總局委員詳稱此案工賑捐輸淮南鄂湘西皖四岸及甯揚各食岸商係分別綱額認運引數按引收捐共計五十四萬七千八百四十八引每引捐銀八錢計捐

銀四十三萬八千二百七十八兩四錢又淮北票販捐款亦照通綱額數收捐共計二十九萬六千九百八十二引每引捐銀六錢計捐銀十七萬八千一百八十九兩二錢統共捐銀六十一萬六千四百六十七兩六錢查清水潭請獎凡各捐生報捐實職虛銜以及

封典升銜統照籌餉例定銀數減二成遞減二成給獎而翎枝貢監從九銜捐免保舉等項均准報捐是減成雖少而獎敘較優直省賑捐獎案凡實職虛銜係照例銀數減四成

封典升銜係減四成遞減二成除翎枝貢監從九銜等項

不准報捐而分先分開儘先等項均准給獎是獎敘稍  
遜而減成較多此上次兩案各有不同之情形也見在  
江甯江蘇籌辦甘黔皖統捐章程其填收減成銀數亦  
與直省賑案獎案無異今如照清水潭請獎辦理凡翎  
枝貢監等項既與近年部章不合若將翎枝等項刪除  
而核計減成銀數又少該捐生等未免更覺向隅上年  
工賑捐數與清水潭相埒而各商依限速繳尤爲踴躍  
惟思此時翎枝等項有礙部章未便援請而減成銀數  
如蒙循照直省賑捐獎案將實職虛銜以及升銜

封典各項分別等差辦理似較平允可否改照直省賑捐

給獎則該捐生等雖未沐翎枝之寵榮尙可邀減成之  
推廣等情查改照直隸賑捐減成收捐自爲鼓勵商情  
起見擬以直隸賑捐案內准捐之分先分開儘先等各  
條酌行添入並照清水潭章程有減有增辦理似較爲  
平允至減成分數可否准照直省賑捐抑或仍照清水  
潭減成收捐伏候核示經鹽政劉坤一批此案李前部  
堂原奏敘明按照清水潭成案遞減二成給獎此次若  
改照直隸賑捐減成核與奏案未符礙難准行其翎枝  
貢監等五項與近年部章不合亦應全行刪除惟請將  
賑捐案內准捐之分先分開儘先等三項酌行添入姑

准援照辦理

光緒二年七月鹽政沈葆楨奏前設局開辦隄捐共計收捐銀六十一萬六千四百六十七兩六錢遵照定章造具捐生履歷請獎頭批獎冊於本年三月間具詳正在核咨開接准部咨恐於各省捐務有礙等因卽經飭局妥議去後茲據兩淮鹽運司方濬頤江蘇候補道薛書常詳稱伏查此次工賑給獎凡道府州縣及分發並奏明祇准在京捐局報捐各項固不准捐卽清水潭獎案內最優之花翎從九貢監因與部定新章不符亦不准捐較清水潭原案實已從減其詳明增入之分先分間

儘先三項非清水潭原案所有既奉部駁自應概予刪  
除此外不得不將部文所指各節縷晰剖陳如所稱售  
賣捐票及請獎銀數不准減成一節查此項商捐係以  
實銀六百四十兩作例銀一千兩較之外省甘黔各捐  
減四成遞減二成再加折除米價實增數倍之多商人  
卽欲轉售而就輕避重人之恆情孰肯舍各省輕價之  
捐轉買淮南重價之票其不能輾轉售賣似無疑義况  
照籌餉例遞減二成當時捐輸已欠踴躍若再不准減  
成似與甘黔各捐懸殊太甚不足以昭激勸又所稱報  
捐職銜封典各項均不得逾五品一節查兩淮商人自

清水潭直隸賑捐邀獎之後官階已至四五品者甚多  
此案捐輸復邀獎敘非加捐三四品升銜卽捐請二三  
品封典若以五品爲限是其中未有功名或五品以下  
者均得邀獎勵而已逾五品及已至五品者轉抱向隅  
未免稍覺偏枯又所稱祇准移獎子弟不准移獎異姓  
一節查商人辦運多有合本不皆同姓彼此之通融多  
寡之併湊皆屬人情之常其中本身及子弟已有功名  
不願加獎或撥與同宗請封者有之或撥與至戚捐職  
者有之此外尙有老成夥友出力多年藉此獎敘用作  
酬勞均不得不曲爲原諒且與歷辦清水潭直隸賑捐



成案相符實收早已給領頭批獎冊業經詳送二批亦已造齊未便再事更張頓令失望詳請具奏前來臣查前年工賑需款多方激勵始據各商捐銀六十餘萬兩是輸將之恐後實由許獎之在先若將奏咨已准之案遽行更易不獨無以對目前報效之人又何以爲日後緩急之勸合無仰懇

天恩俯准仍照清水潭原案給獎並准一體移獎親族以慰商情而昭信守嗣於八月奉部復准其應解飯照銀兩令隨同獎冊解部以資辦公

光緒二年十月署運司劉瑞芬札本年九月遞到總督鹽

院沈函諭江北歲收歉薄流民必多目下兩淮運道幾於無處不淤兩淮饑民待賑岌岌與其增新引以奪舊商之利何如令舊商竭力報效自開水利核其所費多寡許以不增新引若干年公私兩受其益等因當經飭據淮南總局傳集淮南運商肫切勸諭每引捐銀五錢以濟要需諸商踴躍急公均各遵照認捐祇因自同治十年迄今止得六年大捐三次商力實有未紓而十三年分捐銀之商尙有未經輪運者有甫經輪運鹽尙未銷者尤覺周轉爲難呈請將每引五錢之數照依上年行銷三十四萬八百二十九引均勻攤派共捐繳銀十

七萬一千九百餘兩聲明今冬先繳一半餘歸明春二三兩月繳清業經轉稟督鹽憲察核在案淮南運商大局辦定淮北票販亟應一律照捐况淮北自同治九年以來僅於十三年分每引捐銀六錢其額引逐漸提前並無積滯商人轉輸利便遠勝淮南本年有慕淮北利厚兩次具稟請加十三萬引其報效銀十九萬兩督鹽憲批行本署司核議概予註銷停其報效體恤保全至渥極優該票販等激發天良照依上年每引六錢勻捐係屬誼不容辭亦非力不能逮姑念淮南已經辦定每引五錢不必再飭淮北加增卻不能援引上年比淮南

減捐二成有零之說再饒脣舌又查此次憲行勸捐以工代賑係爲辦要工而資民食起見並未指定何處工程前爲淮北王家渡至安東大關一帶該票販等本有湊捐借墊銀五萬兩之議本署司見經稟明督鹽憲所有王家渡一帶工費准予就欸開支毋庸該票販等重疊另捐如有先已捐繳之銀准其扣抵並無庸在庫借墊以示體恤而省轆轤該分司並卽傳諭各票販知之嗣於十二月海分司于寶之稟稱票販鴻慶順等稟稱北鹺自曾文正公初復定章先鹽後課成本較輕餘利尙厚嗣改先完全課場鹽復價運費增多繼以兩次工

捐不下五十萬兩本銀則遞年加增賣價則定數難越  
統計全綱餘利較從前大減販等自奉准循環後竭力  
從公如本年挑濬臨浦河道預納倉穀四綱河費五綱  
幾及三萬兩又稟請捐挑三場串場河計用銀一萬六  
千餘兩兼之今春河乾壬申開綱後直至七月底甫得  
捆運由王家渡以達西壩節節築堰灌塘層層用船駁  
運成本愈重則餘利愈輕况全綱運竣適湖水淺枯湖  
販寥寥壩銷頓滯奉督鹽憲轉飭預籌下綱辦法販等  
亦不敢以本綱成本喫重稍存推諉謹將上游安東以  
至王家渡一帶淤塞之處先行擇要興挑約需銀五萬

兩擬先湊繳一成庫墊二成於下綱開售時如數繳還  
此實轉輸不繼不得已之苦衷茲於工賑捐款仰蒙督  
鹽憲批飭議稟販等苟有餘力敢不力圖報效但北鹺  
四包成引與淮南八包成引相去懸殊利息之薄人所  
共聞且時近歲闌既須接濟場商之寒付轉瞬春令又  
須籌畫全綱之錢糧與夫鹽價運費若照淮南一律捐  
繳販力實有未逮茲販等公同籌議捐銀十萬兩所有  
本年春間捐挑串場河經費銀一萬六千兩同一以工  
代賑有案可稽擬請俯准援照運憲來札與王家渡工  
費一併准其扣抵核計販等所捐此數較之淮南八包

成引之捐數已屬有盈無絀至安東鹽河興工在即需款孔殷販等深知庫款不充未敢請墊惟有於年內趕緊設法先繳一半見銀四萬二千兩聽候河工撥用其餘銀四萬二千兩求緩至來春開綱後陸續繳清仍遵督鹽憲批示留爲淮北再行接挑上游鹽河之用乞會詳各憲俯如所請再販等見捐賑米二千石已奉漕憲飭令豐濟倉兌收不敢再請扣抵合併聲明等情前來伏思該販等所稟懇不爲無因淮南八包成引淮北四包成引獲利相去倍蓰淮南係照上年銷數報捐按額牽算每引尙不及五錢淮北額銷有定今該販等所請

捐數核之淮南實捐之數似亦不甚懸殊可否仰乞憲  
恩俯如該販等所請准予捐銀十萬兩至去年各販捐  
挑串場河經費一萬六千兩稟請一併扣抵查王家渡  
河道已蒙前運司札飭准於此項捐款內開支其挑串  
場河一欸似未便再扣所請已經批駁仍令捐定十萬  
兩數目除留挑王家渡河道一項外所餘銀兩仰懇仍  
留淮北以備接挑鹽河上游之用藉紓販力以示體恤  
等因經鹽政沈葆楨批此項捐輸就淮南每引六百斤  
捐銀五錢而論淮北每引四百斤議捐銀十萬兩數尙  
相符惟北漕轉輸較速且見值眾工畢舉需用尤繁卽



不能如淮南五錢之數亦當每引捐銀四錢以免奇零而昭畫一每綱額銷二十九萬六千餘引共須捐銀十一萬八千餘兩卽轉諭各販分作兩限於三月內一律繳清聽候隨時飭撥應挑王家渡河道工費准在前項捐款內動支其去年春間所挑申場河經費不准扣抵

光緒十三年九月運司福裕詳河南鄭州決口黃溜南趨前奉諭以兩淮鹽場地處下游其勢岌岌可慮應將上游趕緊設法疏洩以衛淮嵯惟工程甚鉅需款孔殷不得不藉資商力應勸諭淮南北綱食各商捐繳銀兩以

資興辦等因茲據江甘五岸籌銷委員會同淮南總局  
詳據鄂湘西皖四岸運商雲豐恆等稟稱遵卽捐銀四  
十萬兩但各商在場者少散處四岸者多請分爲三限  
呈繳或在岸局或在總局應聽商便等情經該委員等  
酌議初限於本年十月十五日前繳銀十四萬兩二限  
於本年年底爲度陸續完繳銀十三萬兩三限以來年  
四月爲度清繳銀十三萬兩至何商在岸局呈繳何商  
在揚局呈繳並飭分別開具花名銀引清單呈送以備  
查核又據該委員等詳據通泰兩屬場商稟認繳銀三  
萬兩食岸各商稟認繳銀二萬兩均請按引分限呈繳

亦經該員等議於本年十月十五日初限場商先繳銀一萬兩食岸各商繳銀六千六百四十兩本年年底二限場商再繳銀一萬兩食岸各商繳銀六千五百八十兩來年四月三限場商清繳銀一萬兩食岸各商亦清繳銀六千五百八十兩又據署海州分司項晉蕃稟據淮北票販鴻慶等稟稱公同集議擬認捐銀十四萬兩以濟要需除奉面諭捐銀三萬兩已由庫墊解外其餘十一萬兩仍由憲庫先行墊解統計十四萬兩請分五綱按引隨課帶解又淮北場商認捐銀一萬兩共計十五萬兩稟經該分司以前奉憲諭捐銀三萬兩已由庫

先行籌墊解交徐州道兌收其餘十二萬兩該分司擬再由庫起卽墊解五萬兩並飭各票販先就甲申綱起捐儘年內見繳銀五萬兩其餘二萬兩定於來春仍由該分司墊解清欸統計先後由該分司庫墊解銀十萬兩內應歸票販繳還銀九萬兩場商繳還銀一萬兩惟分作五綱清繳爲時過久擬請將票販應繳之九萬兩俟屆乙酉丙戌兩綱開辦截數時隨課帶繳其場商應繳之一萬兩亦卽在於乙丙兩綱應發各場商鹽價內扣還乙酉綱於本年十一月開辦丙戌綱應於來年九月內開辦雖收捐分作兩綱而限期有定來年必可全

數繳清等情查總計南北集成六十萬兩際此場運交困之時各該商等分認鉅款尙能力顧大局至該印委等所擬分作三限呈繳淮北又請先由庫墊係爲求紓商力起見似可俯如所請謹將淮南甯揚食岸各商按照認引分限應繳銀數開呈清摺 各食岸共認繳二萬兩查照各岸認運共三萬六千八百四十八引每引應攤銀五錢四分二釐七毫七絲零 江甘等食岸共計認運二萬引應繳銀一萬八百五十五兩四錢一分 上江等食岸共認運七千八百四十八引應繳銀四千二百五十九兩六錢六分 高溧句食岸共認運四

千引應繳銀二千一百七十一兩八分 泰興食岸認  
運四千引應繳銀二千一百七十一兩八分 儀徵食  
岸認運一千引應繳銀五百四十二兩七錢七分經鹽  
政曾國荃批食岸每引所攤銀數及三限應繳銀清單  
甚爲明晰其鄂湘西皖如何分岸按引攤派又南北場  
商是否按引派數每引應派若干均亦未有成案以仿  
照何案爲妥查明具覆

光緒十三年十月鹽運司福裕呈淮南四岸運商認捐籌  
防工需分限攤繳銀數

鄂湘西皖四岸共運行五十六萬三千七百六十引見

據各商認捐銀四十萬兩計每引攤派銀七錢零九釐五毫二絲二忽

鄂岸運行十五萬引

湘岸運行十五萬四千引

西岸運行十七萬引

以上鄂湘西三岸共運行四十七萬四千引以每引攤捐銀七錢九釐五毫二絲二忽計之共應捐銀三十三萬六千三百十三兩四錢二分八釐每票五百引應攤捐銀三百五十四兩七錢六分一釐

皖岸運行南鹽五萬三千七百六十引

皖岸運行北鹽三萬六千引

以上皖岸共運行八萬九千七百六十引以每引攤  
捐銀七錢九釐五毫二絲二忽計之共應捐銀六萬  
三千六百八十六兩六錢九分四釐七毫二絲每票  
一百二十引包零應攤捐銀八十五兩一錢四分二

釐六毫四絲

光緒十三年十二月淮南場運食岸商人聚和公等稟大  
部見已停海防捐輸奏准開鄭工新例核定各項收捐  
章程以充河防要需查前因清水潭捐及黃河工賑捐  
案凡實官銜封貢監各項比照當日見行籌餉事例皆



准報捐至直隸災賑捐銀卽分先分閒儘先等花樣亦  
蒙核准近年皖省東省賑捐因籌餉捐例停止亦准以  
尋常虛銜升銜封典給獎光緒六年捐繳邊餉一百萬  
兩大部亦允給獎敘祇以繳足之日正在停捐之時因  
未敢呈請邀獎此次籌防河患報捐銀數旣多於清水  
潭等捐而濟用又係河防大工見開鄭工新例所收捐  
銀卽專撥河工之用是商等所捐本與之一律請奏准  
照鄭工新例章程給獎若前已捐過官階或捐銀有餘  
准移獎子弟親族並准歸入鄭工卯次補選經鹽政曾  
國荃批部文內稱兩淮鹽商前於籌備餉需案內奏准

公捐一百萬兩擬援成案按照引票勸諭該商等捐輸  
一次照所捐銀數給予虛銜封典獎敘不得以商情疲  
累空言搪塞等語是大部屬望甚奢但該商等已捐六  
十萬兩勢難重複當爲之剴切陳奏至獎敘一層自籌  
餉例閉部章恭嚴今昔情形迥乎不同况鄭州例開減  
爲六折收捐正所以廣招徠藉濟工用若以商捐例獎  
改請實職有礙新例捐務必干部駁自應恪遵部文辦  
理

光緒十四年正月署鹽運司田國俊申前司奉批鄂湘西  
皖如何分岸按額攤派又南北場商是否按引派數每

引應派若干仰再分飭查明刻日具覆等因經前司分飭議撥先將兩淮綱食運商分岸按引攤派銀五十六萬兩先後呈報在案並據淮南總局委員呈據通泰場商聚和公儲鼎豫等稟稱擬請將各場捐銀三萬兩按引三分攤繳以捐足百萬引繳足三萬兩爲止並請仿照歷次捐賑成案由開欵中設法挪墊一經按引扣繳卽行陸續歸還不致久稽時日等情經該局員等議照案由各錢店按期限如數墊欵呈繳按月認息八釐自本年十月初一日起於各商售鹽時每引捐銀三分一俟捐足三萬兩本息銀數卽行停止又據海分司申據

板中臨三場垣商許德裕等稟稱板浦場太平胸山折派十四萬二千十引應繳銀六千七十兩中正場折派六萬五千六百七十引應繳銀二千八百十八兩臨興場所屬臨浦局折派四萬三千四百五十引應繳銀一千一百十二兩擬請於乙酉綱後五成應得鹽價內扣繳銀五千兩並於丙戌綱應得鹽價內扣繳五千兩等情亦經該分司批准照辦理合具報查考

光緒十四年六月鹽政曾國荃奏淮南捐輸鉅款並擬循案給獎一摺內稱上年八月間鄭州決口黃溜南趨臣奉

命籌辦清江等處河工需款浩繁當經奏撥江蘇江甯兩藩  
庫銀三十五萬兩不敷尙鉅聲明勸導商民捐助河工  
賑款飭傳淮南運商淮北票販多方勸諭其允捐銀六  
十萬兩分作三限定於本年四月底繳清旋准部咨令  
兩淮鹽商按引票捐輸一次等因查九月內勸捐之數  
各商本係按引分攤業已捐輸於前自難重捐於後但  
部臣議令鹽商捐輸佐經費之不足既不便重捐累商  
必須在於此項內酌數分撥庶獲兩全經臣嚴飭承辦  
司道將前項捐輸格外撙節動用自上年十月十五日  
初限起據各商陸續呈繳隨時撥濟清江河工銀十七

萬兩下河工程銀十一萬兩籌備賑穀銀五萬兩共已  
支用銀三十三萬兩擬留二十萬兩聽候部撥所存祇  
七萬兩萬一江省遇災斷斷不敷濟用祇可臨時設法  
奏明辦理該商等所捐銀數謹遵部議祇准給予虛銜  
封典獎敘查鄭工新例及豫省賑捐均照例定銀數核減  
五成其各省向收賑捐者經部臣奏准一律辦理准商  
捐輸係爲工賑而設自必未便兩歧相應請

旨敕部查照新章減成給獎奉

旨戶部議奏經戶部議覆臣等伏查前因河南鄭州黃河決  
口臣部籌議工賑急需條奏陳明各省鹽商均令捐輸

請獎並查兩淮鹽商前於籌備餉需案內公捐一次銀一百萬兩見在河工用款浩繁擬令兩江總督轉飭兩淮運使勸諭該商等捐輸一次捐有成數專款存儲報部候撥並按所捐銀數給予虛銜

封典等因於光緒十六年九月二十日奏准行知遵照在案今據曾國荃奏稱兩淮運票各商共捐銀六十萬兩既經該商等齊力輸將集成鉅款自應予以獎勵不沒其報效之忱臣等公同商酌擬請准如該督所奏援照賑捐新章給獎所有請獎

封典虛銜等項均按例定銀數核減五成以昭激勸並應

下濟監志 卷一百四十一  
三  
另造獎冊專案報部不得附入鄭工大捐俾免牽混至  
擬留聽候部撥銀二十萬兩應令該督轉飭兩淮運司  
專案存儲不准擅行動用奉

旨依議欽此

光緒十四年九月運司福裕詳部議內開淮南捐款六十  
萬兩准照賑捐新章按例定銀數核減五成給予

封典虛銜等項以昭激勸並飭另造獎冊不得附入鄭工  
大捐俾免牽混各等因本司查上年鄭州決口兩淮商  
販統共捐銀六十萬兩既奉議准給獎自應遵章辦理  
謹擬章程四條 一此次捐繳籌防工需請獎於開辦



時查照歷屆成案先由本司刊刷實收數百張蓋用司印發局以便隨時填給各捐生收執以昭信守此項捐銀共計六十萬兩爲數較多若俟請獎事畢方始造冊詳咨恐稽時日應請循案以獎及十萬兩之數卽請奏獎一次庶各捐生得以早換部照時日不致久延以清捐案 一各捐生應繳部飯照費公費等欸查淮商歷次獎案每捐數一百兩隨繳部飯照費公費庫寶銀三兩此次應照核收除部飯照費按數造冊呈請咨解外其餘留備應支各項公用事竣造冊報銷以昭核實 一此次淮南各捐生赴局請獎應照案將年貌籍貫三

代履歷及見請何項獎敘並原捐花名銀數詳細開單  
檢同原領收照投呈到局卽由該委員核明各數如果  
相符方准牌示局前一面令繳部飯照費公費卽行填  
給實收統限六箇月內一律報捐完竣以示限制惟各  
商原捐銀數與所請官階例銀減成數目不能適相符  
合應請循案准其移撥親友則捐多者可以分獎捐少  
者可以合獎總以有盈無絀爲斷各捐生原捐銀數不  
得分爲兩次請獎以免轆轤至淮北各商販捐銀十五  
萬兩應飭海分司查照年貌履歷清冊連同部飯照費  
公費解局俾得按名填給實收彙案請獎 一此次請

獎事宜擬由淮南總局委員經理不另設局其句稽例案銷算銀數核對原捐收照填發實收等事亦頗煩瑣應照案在總局隨員內酌派數員隨同辦理以昭慎重而資周妥至委員薪水及書識辛工伙食油燭紙張等費均擬循照歷屆獎章在於所收公費項下開支

光緒十五年三月鄂湘西皖四岸運商金永隆等稟上年因鄭州決口籌備河工要需商等及淮北食岸場商共捐銀六十萬兩茲據淮南總局牌示章程各捐生應繳部飯照費公費等欸查照淮南歷次獎案每捐銀一百兩隨繳部飯照費公費庫寶銀三兩此次應照核收等

因伏查前屆清水潭獎案每減成實銀百兩收部飯照費公費等欸銀三兩此外並不多取毫釐亦無別項費用名目嗣工賑捐輸獎案卽仿清水潭及賑捐章程按照每捐銀百兩隨繳部飯照費公費銀三兩係部飯照一半公費一半均以實銀計算並非照例銀核收今奉牌示查照歷次獎案而商等開具履歷請獎飭令照例銀百兩呈繳部飯照公費庫實銀三兩竊思此案照鄭工新例核減五成照賑捐新章給予銜

封例銀旣減部飯照公費亦必當隨減方與淮南歷辦成案相符若例銀係減五成以實銀百兩可作例銀二百

兩而部飯照公費按例銀呈繳卽係實銀百兩令繳銀  
六兩較諸成案未免加倍之多不知部飯照費究屬若  
干卽此次部飯照費部中按例銀核收而公費一半亦  
當仍照實銀扣算且向來部飯照公費銀兩除隨冊咨  
解外應支各項公用亦均有一定章程諒無須倍加則  
公費本係外銷似更當照歷屆成案辦理工商等祇因此  
次捐輸實銀共六十萬兩隨繳部飯照公費共應一萬  
八千兩儻竟倍於歷屆成案其數卽有三萬六千兩之  
多籌思至再殊切懷疑請示飭遵再今歲恭逢

覃恩凡虛銜加級請

封能否捐一級隨帶餘級尋常照向例辦理並求示遵行  
鹽政曾國荃批查鄭工正捐部飯公費係照例銀每百  
兩核收三兩蘇皖賑捐係照例銀每百兩核收六兩七  
兩不等今淮南商捐仿照鄭工每例銀百兩核收三兩  
並不爲多業經運司詳定應卽遵辦至總局所收銀兩  
除部飯照費之外尙有核獎等費亦須在費內開支將  
來如有盈餘應由運司查明提充公費以杜弊竇而重  
公項再隨帶加級核與部章未符應毋庸議

光緒十五年四月運司福裕申此次捐助鄭工請獎前呈  
議章詳明限六箇月內一律報捐完竣以示限制當經

開局諭各商呈投履歷赴局請獎嗣因獎數無多又經一再示催茲據該商等稟陳各商散處四方一時未能齊集且向准移獎親族往返函告時日稽遲尙屬實在情形擬准展緩三箇月仍催令各商趕緊投獎以示限制

### 附錄

嘉慶八年七月鹽政佶山奏淮南商人洪箴遠等呈稱湖北宜昌府屬巴東歸州興山三州縣向無城垣見籌建築公捐銀十萬兩以濟城工之用

同治五年七月分司沈炳稟查金山兵燹之後亟應捐修

以復古制淮南已有成數淮北亦宜照辦惟辛酉綱各  
販認引卽須先繳見課池商收數又須酌復鹽價商販  
公同集議情願於復價內捐銀一萬兩以襄善舉擬請  
辛酉綱掣鹽出場時按引捐銀四分一俟捐足一萬兩  
之數卽行停止等情卑職復加查核商情尙屬急公所  
議亦甚允洽似應俯准照辦經鹽政批准

謹按宜昌城工金山廟捐亦工程之類故附於河工  
後



兩淮鹽法志卷一百四十八

捐輸門 助工